

Communicaziun a las medias

Conferenza da medias "Sessiun a Flem" dals 7 da zercladur a Berna

La Sessiun – in confess a la quadrilinguitad da la Svizra

L'emprima sessiun da las chombras federalas en il territori rumantsch è in confess a la quadrilinguitad da la Svizra e porscha la pussaivladad unica da promover la chapientscha vicendaivla tranter las differentas regiuns e culturas. Il Grischun vul metter a disposiziun in ambient da lavur professional al parlament federal e sa preschentar il medem mument sco chantun multifar en quai che concerna la lingua, l'economia, la cultura e la politica.

Ordavant sto vegnir constatà: Las commembras ed ils commembers da las chombras federalas vegnan en il Grischun per far lur lavur parlamentara. Quai duai esser pussaivel en in ambient che porscha il medem confort sco a Berna en quai che riguarda la lavur ed il alloschament. Quai garantescha en emprima lingia il "Park Hotel Waldhaus" che pussibilitescha la realisaziun da la sessiun en in'atmosfera unica. I dat però er chaussas che vegnan ad esser dal tuttafatg autras en il Grischun che a Berna. Tar quellas tutga il sun dal rumantsch. Quel vegn ad accompagnar las commembras ed ils commembers dal parlament al lieu da la sessiun, en la regiun da la sessiun sco er tar las differentas excursiuns en las vischnancas ed en ils territoris rumantschs. En divergenza dal manaschi da sessiun usità duai vegnir purschida la chaschun d'emprender ad enconuscher il chantun Grischun e sias particularitads en il contact direct cun il pajais e cun la populaziun. In program d'excursiun e d'occurrentza ch'è accordà cun ils basegns da la sessiun cuntegna la confruntaziun cun dumondas tematicas, daletgs culturals, sport e giu e tut simplamain in star a cumpagnia patgific.

La responsabladad per realisar la sessiun en il Grischun han il chantun Grischun, la regiun Surselva, las vischnancas da Flem Laax Falera e lur organisaziuns turisticas sco er la "Park Hotel Waldhaus SA", la lia rumantscha e Grischun vacanzas. La finamira da las partenarias e dals partenaris è quella da s'occupar optimalmain da las parlamentarias e dals parlamentararis sco er da las visitadras e dals visitaders da la sessiun. Sco portal d'entrada a l'areal da la sessiun vegn endrizzà in center da visita per las visitadras e per ils visitaders. En in gir tematic intermediéscha quest center da visita aspects interessants da la cultura e da l'economia dal Grischun. Il center da visita è concepì sco lieu da scuntrada e da divertiment che preschenta cun differents munds tematics la diversidad proverbiala da la regiun alpina dal Grischun en moda sorprendenta ed interactiva.

Il lieu da sessiun a Flem è bain cuntanschibel tant cun ils meds da transport publics sco er cun l'auto privat. La colliaziun davent da la staziun da Cuir vegn garantida tras curs regulars da l'auto da posta. A Flem stat a disposiziun ina purschida da park-and-ride, da la quala circuleschan bus da shuttle en curts intervals tar l'areal da la sessiun ed enavos. Las parlamentarias ed ils parlamentararis sco er las visitadras ed ils visitaders dastgan spetgar ina ritga gastronomia, pussaivladads multifaras da far excursiuns ed in'accoglientscha cordiala tras la populaziun da Flem e dals conturns.

Il chantun Grischun e sias partenarias e ses partenaris impundan circa 1,5 milliuns francs per la realisaziun da la sessiun en il Grischun. Mintgamai in mez milliun tutga al chantun ed a las vischnancas da la sessiun d'atun Flem Laax Falera. Circa 350'000.– francs dals custs surpiglian las regiuns e las vischnancas d'excursiun sco er sponsuras e sponsurs. Ina part da 150'000.– francs va a donn e cust dal preventiv da la confederaziun. Las lavurs avanzan tenor plan ed en ina enclegientscha excellenta cun il presidi da las chombras federalas e dals servetschs dal parlament. Ils 21 da zercladur 2006 ha lieu a Berna in'occorrenza speziala cun il num "Flims Klang Gästeanlass", la quala duai preparar spezialmain per la sessiun. Questa saira vegnan las parlamentarias ed ils parlamentararis directamain en contact cun las caracteristicas grischunas.